

font la guerre desirant de vous détruire, ie vous veux armer contre eux: là-deffus il luy fait present d'une belle arquebuse, qui estonna ce bon Neophyte, car ces armes leur font toutes nouvelles: Allés, luy dit-il, exhortés vos Compatriotes à embrasser la foy que vous aués receuë, & les assurés de ma part, que ie les protegeray, s'ils se rangent au giron de l'Eglise: Ce discours finy, le Capitaine de nos Chrestiens de Saint Ioseph se leue, & [77] apostrophant ce nouveau Chrestien, luy dit.

Mon frere, tous les Sauvages que tu vois icy à l'entour de toy font Chrestiens, nous auons tous quitté nos vieilles coustumes, nous auons jetté bas les sotifés & les superstitions de nostre Nation, tu ne scaurois conceuoir la ioye de nos cœurs, voyans que tu embrasses nostre creance, & que tu as choisi cette petite Eglise pour y estre fait nostre frere: öüy, tu l'es maintenant, nous n'auons plus qu'un Pere, qui est Dieu, & qu'une Mere commune, qui est l'Eglise; voycy donc tes freres qui te declarent, que tes amis font leurs amis, & que tes ennemis font leurs ennemis; & pource que nostre Capitaine t'a fait present d'une arme à feu, tes freres te presentent par mes mains de la poudre pour t'en feruir dans les besoins, en ton retour.

A ces harangues le bon Charles Sondatfaa respondit: *Onontio grande Montagne*, (c'est ainsi que les Hurons & les Hiroquois nomment Monsieur nostre Gouverneur, à cause qu'il s'appelle de Montmagny) le nom que vous m'aués donné est un riche present, c'est une obligation [78] qui m'est particuliere, de laquelle ie me ressentiray toute ma vie, ce canon que vous aués adjousté, fera un grand bruit dedans nostre